

四庫全書

集部

欽定四庫全書

椒邱文集卷二十二

明 何喬新 撰

詩

五言律詩

輓徐僉憲父母

二首

澄潭嘉遯處雲樹藹幽居  
歲歉頻捐粟鄰爭每赴閭  
春歸雲榻冷月落夜臺虛  
竊刻中郎筆文光照故墟

靜莊鍾懿質窈窕播徽音象掃無嬌習熊丸見苦心斷  
機蛛綴密荒砌蘚痕深繡牙焚黃日愁聽陟岵吟

夜坐感懷

獨坐無誰語寒燈伴寂寥敝衾愁夜卧疲馬怯晨朝往  
事嗟何及新憂鬱未消何當解塵鞅泉石自逍遙

輓張貢士紀

新會人

之子南州彥觀光到日邊未承黃屋問遽作赤城僊塵  
暗呈親卷雲寒坐客氈阿咸扶旅櫬歸路淚潸然

輓會稽陶懷祖父母

合葬鳳  
效山

偕老世應少，偕賢古亦稀。  
鹿門方共隱，鳳效忽同歸。  
窻月窺殘帙，庭螢泣斷機。  
孝孫今令伯，清淚不勝揮。

輓大理卿王公宇

二首

正氣鍾河嶽，芳聲藹搢紳。  
民歌清白吏，國重老成人。  
素蘊嗟方展，清標悵永淪。  
寒颼吹畫翬，行道共沾巾。

相閥槐堂遠，儒宗洛學優。  
文宜摘睿藻，材足贊皇猷。  
舊舍甘棠老，新塋宿草秋。  
清名知不朽，高碣照林丘。

游鼓山次主一僉憲韻二首

鷲嶺幾千仞登臨眺八方  
瞻天拱北極望海見東洋  
嵐藹晴浮碧天花曉雨香  
莫愁歸路暝明月在山陽  
花梵鐘聲遠莓臯石徑微  
山花晴墮几泉沫冷沾衣  
香閣僧眠穩懸嵒客到稀  
來遊愜清賞日暮未言歸

谷洋公館次尹亞叅韻

石徑烟蕪綠行行思轉迷  
雲深田蛤吠雨歇竹鷄啼  
流水聲鏘玉橫橋影卧  
霓欲窮登覽興殘照墮林西

獅峰寺次景澄韻

象宇臨幽境，猊峰竦異形。  
松雲侵榻冷，竹露墮衣青。  
唼鶴驚晨鼓，啼鶯亂畫鈴。  
停車問民瘼，淒楚不堪聽。

輓高時旭

蚤負青雲器，才華衆所憐。  
終童徒有志，賈傅却無年。  
宿草迷孤壠，浮埃掩素絃。  
鳳雛今已長，振羽五雲邊。

夢中詠珍珠李

成化戊戌秋，予行部至荊門。  
夢人贈予以嘉樹，高可

尺五素花碧實葉光澤如沐植以甕盆予問此何樹  
答曰珍珠李也予因賦五言近體一章既覺忘其第  
七句因推上下文意足之時八月廿六日夜也

天上三珠樹移栽傍玉墀素花晴蔌蔌翠實暖離離不  
受風埃污偏承雨露滋江梅同氣味調鼎豈終遺

安陸道中見老馬僵卧為之慨然賦二律紀之  
龍媒天廐種老去力何衰霜重銀蹄裂天寒玉筍垂  
陽懷茂草汧隴想青池千里心猶在駕駘莫浪欺

壯歲從飛將橫馳北戍邊暮營鳴咽水曉飲鷓鴣泉曾  
逐烏騅死仍驅赭汗旋風霜筋力憊僵卧楚山前

宿普門寺次都憲副韻

四首

畫壁丹青古祇園竹樹深花香來別磴松翠墮危岑雲  
暝龍歸鉢天空鶴度林老懷清似洗不愧古禪心

鳴騶過谷口遙望梵宮深弭節穿金澗看雲度碧岑鐘  
聲晨出壑錫影暮歸林坐覺諸塵寂悠悠水月心

寶刹新營日賢藩寵佑增沉檀放內帑衣鉢屬名僧清



梵和天籟禪心映佛燈虎丘推勝境空有塔層層

一宿空王宇悽然百感增素餐慚省職高卧羨山僧問  
俗晨紆轡觀書夜對燈故園何處是夢遶碧雲層

商王河亶甲廟

書有河亶  
甲篇今亡

遷國啟雄圖遺靈食舊墟明裡來郡邑禱賽走樵漁德  
業三宗後丹青百禩餘樂天嗟已矣誰為補亡書

白樂  
天嘗

補湯  
征篇

書天寧寺壁

聽訟來彰德星軺駐上方蒲團花雨潤石竈芋烟香古  
塔棲秋鶻空階咽暮蜚雙槐行坐處人說似甘棠

魯山曉發

曉發魯陽城城頭月正明花驄衝宿霧玉節映疎星茅  
店客猶睡荒村鷄未鳴褰帷將問俗不為看山行

江燕二首

江燕何微眇飛飛到汴城閒情同野鶴巧語愧林鶯掠  
水臨瓊澗營巢託彩楹夜來風雨惡歸夢遶南榮

日麗芹泥軟風清杏雨收烏衣辭故國紫閣結新儔樓  
傍麟臺穩飛穿鵲觀幽羣鴉休側目無意競橫秋

宮詞

繡閣香風暖珠簾曙景遲倦吹青玉管愁詠白華詩清  
漏驚宵夢流鶯動夕思羊車幸何處鹽竹謾紛披

武寧關書事

四首

奉詔遠行邊雙旌拂錦韉陣依魚麗法謀用豹韜篇草  
滿蜚狐塞沙填飲馬泉功成何所願遺像畫凌烟

曉度黃花嶺輕裘冒薄寒笳聲驚宿鳥旗影走長蛇孤  
戍烽初暝陰崖雪未乾何當擒頡利奏凱拜金鑾

羣峰環拱處巖崿峙關城北近戎王壘南連漢騎營風  
高懸旆裂雪暗凍顰鳴試數防邊將誰如李北平

鳥道縈孤嶂潼函未足多馬肥秋出獵士飽夜聞歌殺  
氣浮朱戟寒光晃玉珂先聲聞漠北塞騎自投戈

歸田述懷

謝病離天仗山田自墾荒蛙聲占水旱鷄骨卜災祥春

釀黃柑美晨羹紫蕨香閒居多樂事洗硯寫新章

次貳守陳一夔韻

歸來盱水上花竹有餘歡種秫堪為酒無愁勝作官知  
心元不易經世亦良難風雨蕭蕭夜茅廬卧正安

長門四時詞

四首

蒨石鶯聲滑玄墀柳色新枯梢皆轉綠寒谷盡回春對  
酒承和景鳴箏拂素塵自憐衰陋質不得待芳辰

高樹陰雲散深宮暮景涼波添鵝鴈浴風送芰荷香複

道知天近重城覺漏長祇愁新浴處誰與試蘭湯  
鴛瓦霜華重龍樓月影圓自嗟妾命薄敢嘆主恩偏  
擁髻悲前事含顰數昔愆沉思紉扇句得似綠衣篇

天冷肌生粟風清玉散花含情歌白雪適意薦流霞展  
轉翠衣薄低徊玉筍斜君王求故劍何日遣皇華

謁先壠

在桃竹坑

先塋西磧曲宰樹苑榛榛每值澆松侯長懷薦藻心江  
山涵秀色桃竹起清音為語諸兒輩當知世德深

六言絕句

漢川分司偶成

二首

天外淒迷急雨江頭潑沆奔流盡日無人喚渡濟川閒  
却扁舟

吾道將行有命斯文未喪由天休信實家喜鵲試聽蜀  
嶺啼鵲

郵亭偶書

古渡平蕪細雨長亭垂柳輕烟詩景滿前堪畫客懷何

事悽然



椒邱文集卷二十二

欽定四庫全書

椒邱文集卷二十三

明 何喬新 撰

詩

七言古詩

附長  
短句

題東坡遊赤壁圖

長江西來遶赤壁山色蒼蒼江氣白黃岡遷客人中仙  
傲睨江山如戲劇笑吞山月吸江風羈愁肯使嬰吾胸

扁舟夜泛赤壁下文光下燭馮夷宮湘妃歌兮河伯舞  
川后山靈相爾汝同遊一客非時人想是元之與文舉  
酒酣飛上千仞峰呵叱虎豹鞭虬龍倏然獨立風埃表  
俯視塵世皆沙蟲洗磨折戟認前代一炬東風昔稱快  
英雄不數曹與孫况復周郎與黃蓋江空月落高枕眠  
夜深夢到蓬萊巔橫江孤鶴來何許似欲載我歸釣天  
洞簫聲斷客已去起望三山渺烟霧空餘兩賦在人間  
星斗熒煌垂萬古

題祖逖聞雞起舞圖

洛陽雙鵝飛翀天兵塵湏洞如雲烟將軍雅志翊皇極  
聞雞起舞心茫然晉陽有聰趙有勒豺虎憑陵恣殘賊  
中原大半警狼烽誰向河南剪荆棘嘒嘒夜半荒雞鳴  
情知此聲非惡聲披衣慷慨拔劍舞英氣耿耿摩蒼冥  
一舞龍光競揮霍眼中已自無屠各再舞頓挫騰雪霜  
欲掃欃槍靖沙漠可憐瑯琊無遠圖謾憑天險保三吳  
將軍氣欲吞吐谷渡河擊楫聲嗚嗚屯兵雍丘威赫赫

敵軍破膽頻敗北關河部落盡來歸  
燕沛遺民咸仰德兩京未復功未成  
妖星夜照鎮西營天不祐晉將軍歿  
千載英雄長涕零

題明皇秉燭夜遊圖

沉香亭上鳥飛速歌吹未終宮漏促  
歡娛不足可奈何夜遊更東西園燭  
銀盤萬炬照天紅恍如赤日行晴空  
更將羯鼓催花柳共信聖主真天公  
太真娉婷奉卮酒願上大家千萬壽  
隋家天子放流螢熠燿微光詎能久

伶官再拜前致詞祇今四海皆熙熙將有祿山相林甫  
聖人不樂復何為念奴高歌八姨舞鱗膾駝峰薦雕俎  
明朝且放紫宸朝翠帳醒來日方午金鷄帳裏卧猪龍  
內寵不減昔秦宮昏昏醉夢日復夜豈料興衰在眼中  
桃林一戰血沒踝薄暮不見平安火蒼茫西出馬嵬坡  
驛舍無燈相枕卧斜谷鈴聲暮雨寒歸來無復舊時歡  
霜凝鴛瓦不成寐怨對孤燈夜未闌

題韓蘄王湖上騎驢圖

張俊封循王附秦檜殺  
岳飛又欲分背嵬軍者

錦裘綉帽韓將軍江上淮東屢策勛朝端蒼櫓何蒼苑  
干霄蔽日長氤氲高皇未有宣光德指仇為親忠為逆  
烏未盡兮弓已藏岳家父子死讒慝將軍連訴解兵權  
蕭然物外如神仙清涼居士聊自命蹇驢時跨西湖邊  
古槐疎冷秋陰薄門巷蕭條可羅雀相隨惟有舊奚僮  
偏裨盡入循王幕路傍下種故侯瓜湖堤携酒看梅花  
酒酣時過岳侯墓潸然長淚落烟霞敵人忽動南侵志  
舉朝爭獻檀公計黃金不鑄韓蘄王烈士忠臣謾歔歔

題幼安濯足圖

華歆字子魚  
故借用之

當塗睥睨漢家鼎江左孫郎恣馳騁茫茫九域戰塵飛  
潔身東適玄菟境黃雲黯黯炎精昏避地且復依公孫  
公孫非有興漢志俎豆詩書聊共論誰云此地有東鄙  
箕子舊邦風化美同游不獨邴與王尚友欲追孤竹子  
獬子猖狂事漸非扁舟浮海又西歸尚愁黃塵浣吾足  
褰裳自濯滄浪溪滄浪之水清徹底更欲枕流洗其耳  
水中困困疑子魚似亦含羞倏驚逝嗟哉子魚良可羞



昔為吾友今吾仇何當一請尚方劍斷取頭顱擲濁流

題金章宗畫馬圖

混同江上黑龍起雄據中原慕文治欲令頑礦變精金  
文物直追周漢美明昌天子世宗孫善書善畫兼善文  
揮毫拂素貌騏驎神妙不數曹將軍龍鬣鳳臆真無比  
汗血猶沾渥洼水汧陽雲錦非不多如此權奇能有幾  
憶昔武元起海東從騎躩蹠皆游龍西馳木葉風沙靜  
南蹴大梁榛棘空梁王已死陳王戮飲馬泉荒無首宿

天開十二俱下材薄蹄禿尾空多肉此圖想是建國初  
明昌以後此馬無北荒鐵騎忽馳驟山後山前草木枯

壽徐主事父母

金雞喔喔華堂曙佳氣葱葱藹如霧鳳笙吹空奏靈鼓  
五采斑斕紛起舞座中仙翁蓬萊客炯炯雙瞳湛秋碧  
北堂況是瑤池仙鶴髮蕭蕭映珠翟餐玉曾傳却老方  
姓名已入丹臺箴聖皇推恩加寵錫金函寶敕頒明光  
長庚煌煌光照戶花底張筵列尊俎新詞唱徹鶴南飛

笑吸仙人掌中露小鬟吹笙隔雲屏却疑便是董雙成  
仙家元只在人世何須泛海求蓬瀛賢郎久著金闕籍  
翹首白雲歸未得願椿不老萱長存年年歲歲承天澤

送族孫奎會試

我家本是韓侯裔散處江南知幾世黎川之隩平西臺  
簪笏詩書世相繼舸齋直閣典絲綸先公持憲還秉鈞  
孰云族遠情浸薄恩義不啻同產親吾兄長史尤卓犖  
輔導親藩稱謇諤西江庚午棘闈開我與而翁共騰躍

而翁蚤歲委秋霜我今歸田鬢已蒼瓊枝玉樹喜見汝  
森然秀出嗣書香今秋挾策赴鄉試笑談折取蟾宮桂  
鄉書傳得到山中老眼摩挲為驚視我家諸兒愚且蚩  
有書不讀惟遨嬉一經賴汝傳舊德頓令門戶增光輝  
凍雲釀雪北風厲匹馬凌兢隨計吏莫嗟三陟犯隆寒  
萬里亨衢期奮翅龍門浪暖起春雷還將三策獻堯階  
瓊林宴罷歸來晚錦幖前導亦榮哉丈夫立志須遠到  
一第區區奚足道祖宗功德與文章百世休光汝當紹

雙桂堂為秋官李時賜賦

西臺使君人中龍氣酣飛上廣寒宮愛此宮中雙桂樹  
翠蕤金粟何玲瓏移得靈根下仙陌素娥含情不敢惜  
畫蘭文砌重栽培日倚胡牀玩芳色謝家蘭砌謾馳聲  
王氏槐堂未足榮風起似聞環珮響月明恍若蛟龍爭  
使君二子更岐嶷蚤歲聯翩登桂籍仲兮金榜久蜚聲  
伯也雲衢方振翼桂兮桂兮德之符豈同凡木空扶疎  
炎風苦雨慎封植待作明堂構與櫨

題南莊圖壽陳孟祥婦翁

碧梧露冷秋將半  
南極騰輝照晴漢  
主家壽日集羣真  
羽節飈輪來汗漫  
主人元是南莊仙  
五畝青桑二頃田  
對酒高歌紫芝曲  
焚香細和白駒篇  
邇來移住金河曲  
炯炯方瞳貌如玉  
不知遐筭今幾齡  
但覺添籌已盈屋  
翠鳳纔負白鹿烹  
當筵小玉鳴銀箏  
東牀佳客起稱壽  
酒酣笑絕縵胡纓  
披圖却憶南莊好  
坐見滄溟遶蓬島  
何當跨鶴歸去來  
笑拂扶桑拾瑤草

題張將軍廟

諱飛字翼德  
廟在保寧

車騎將軍蓋世雄，蚤年仗劍從真龍。  
並遊惟許多髯翁，俯視餘子猶沙蟲。  
曹瞞欺天悖且克，欲移漢鼎歸鄴宮。  
將軍皆裂髮上衝，忠憤凜凜摩蒼穹。  
佐佑昭烈剪蒿蓬，威如虓虎氣若虹。  
提戈斬級無怛容，萬衆莫敢嬰其鋒。  
取荆蕪益啟漢中，重嘔炎燼光曠曠。  
剖符遂受徹侯封，帶礪河山誓始終。  
天不祚漢構禍凶，變生肘腋殞厥躬。  
飄然騎箕返大空，在帝左右佐化工。  
殄戮厲鬼驅螟螣。

嘉陵江上廟宇崇吏民薦享誠且恭鳳笙鳴鳴鼓逢逢  
飈車雲馬紛來降斷碑苔蘚何重重誰操巨筆曾南豐  
光明俊偉星斗同功名何必上景鐘斯文足表將軍忠  
威靈赫赫垂無窮

送金郎中還南京分韻得韞字

君家兄弟何所擬皎如玉樹翹瓊蘂伯兮早拜地官郎  
典賦南都政聲美叔也新擢白雲司籍籍清名滿人耳  
兩京相望若參商冀北江南幾千里覓句春尋芳草池



看雲晝隱烏皮几  
伯兮奏最來皇都  
叔也承迎多樂豈  
超朝紫陌曉聯鑣  
聽雨寒窓宵共被  
墳簾迭奏肅以容  
不必清商間流徵  
歡娛未洽又分携  
戒行曉逐雞聲起  
賓朋出祖官道傍  
金卮潑灑香浮蟻  
蘆花飛雪暗長汀  
楓葉栖霞映秋水  
離亭分手正淒然  
况復秋空雁聲唳  
征車鱗鱗不可留  
離懷戀戀何時已  
遙知別後重相思  
愁看荊花春韡韡

讀西臺愴哭記

留夢炎葉李俱以宋臣仕元貴顯方鳳吳思齊與謝翱同隱終

身不仕

北風怒撼龍舟覆十萬貔貅葬魚腹廬陵魁輔死燕山  
頸血化為原草綠當時門下多俊材烏散雲消那敢哭  
裂冠毀冕彼何人俯首穹廬食讎粟轅門從事抱孤憤  
芒屨潛行嚴瀨曲肯隨留葉立新朝甘與方吳卧空谷  
朔風直上千仞臺采采溪毛薦寒涼歌殘楚些招不來  
蕭瑟寒飈振林木仰天長慟天亦愁山鬼驚啼猿躑躅  
冬青樹下頻往還淚眼摩挲望天目鳳逝龍亡王氣消

日暮驚鳥止誰屋褰裳幾度濯江潯尚恐塵汙浼吾足  
帝曰巫陽汝下招促駕青虬歸玉局饒歌騎吹世空傳  
月表未成竟誰續殺魄雖埋神不沒仙遊想在文山麓  
相逢握手共歎歔細論興亡淚如掬浮雲倏忽風中燭  
忠義千年有餘馥歸然荒冢釣臺東我欲乘風莫醺醺  
題鄭氏齊壽堂分韻得彩字

三神之山渺何在員嶠方壺峙瀛海華堂誰築山之巔  
雲氣連蜷浮瑞彩堂中偕老地行仙雙頰如丹雙鬢雖

懿行真為百世師靈宗況出前朝宰平生酷慕王儒仲  
偕隱山中知幾載石田烟暖茁瓊芽琪樹春深結珠蕾  
祇今遐筭踰七旬合樂張筵慶嘉會潏灩霞觴玉作流  
芳鮮雕俎龍為醢蟠桃花下共稱觴載詠周詩歌壽愷  
賢郎元是蟾宮仙剪得春雲供戲綵願祝雙親偕百齡  
炯炯方瞳神觀倍丹成不必跨黃班鸞鶴翔空正相待

蘇墨亭

都水主事山陽尹君治徐州洪得蘇文忠公題名於

亂石中其文曰郡守蘇軾山人張天驥詩僧道潛月中遊君洗滌汙垢識為坡書昇置其視事之所作亭以覆之翰林學士徐先生題其亭曰蘇墨過而覽者咸有賦詠焉噫君之於文忠公之遺墨寶愛之如此則於公之平生風節所向慕者深矣

彭城太守眉山翁雄詞勁節人中龍叩閣連疏詆新法一麾來此綏疲癯雲龍山人亦超絕每御仙禽遡天末詩僧況復有參寥耻與貫休較工拙長空月白玉宇秋

扁舟載月缺邊游塵襟蕩滌殆欲盡便疑身世在瀛洲  
瓊樓貝闕涼如洗月華倒蘸金尊裏酒酣俯視塵中人  
甕盎醯雞飛復止醉磨山骨題姓名金戈寶劍何稜稜  
不知埋歿幾百載夜深尚有虹光騰多才水部偏好古  
得此方珉硤上土剡苔滌垢識坡書寶愛不啻岐陽鼓  
芳亭彩檻深且崇壯夫昇來置其中細觀頓覺心神肅  
姿媚豈與黃庭同吳興墨妙委芳草學士新題名更好  
千年化鶴倘來歸再與摘詞美草老

題陰崖舞鳳圖

畫船昨泛湘江曲  
江上蕭疎森紫玉  
天邊彩鳳忽飛來  
羽毛猶帶湘雲綠  
陰崖曉霽暖烟消  
翠蕤飛舞風脩脩  
九疑凝黛湘波靜  
林間彷彿聞簫韶  
黃陵廟前春欲暮  
鷓鴣啼斷班班雨  
好向虞廷覽德輝  
碧梧拳拳搏桑曙

題霜林孤鷹圖

霜林搖落秋天迥  
鷺鳥摩空風力勁  
大鵬却避狡兔愁  
老樹無聲萬山靜  
喬柯獨立何雄哉  
金眸玉爪非凡材

健翮孤鶩晴雪落老拳怒攫寒雲開荒城古社多狐鼠  
閱翳荆榛嘯烟雨乘秋一掃妖穴空萬里寒霄看高翥

白髮行

我昔年方十六七面如玉盤髮如漆玉河堤上脩禊時  
公子王孫皆自失聖朝天子詔興賢詞場早著祖生鞭  
杏花園中會羣彥同輩共詫人中仙天官掄材官粉署  
晝閱刑書夜繙素誰云勞悴損容顏雙鬢青青祗如故  
外臺持憲陟薇垣北臨汴水南閩山奸氓老吏竊相語



使君精悍猶童顏一從仗鉞臨冀北漸覺三莖五莖白  
承恩召拜秋官卿猶幸簪中強半黑去年解紱辭清朝  
歸來林下自逍遙滿頭一夕垂白雪縱遇春風未易消  
少時一覽輒成誦筆底詞源似泉湧于今百過旋遺忘  
揮毫不啻千鈞重間中覽鏡空自悲百歲光陰能幾時  
家人進酒強開慰天運如此非人為有形畢竟還銷爍  
世上應無不死藥何須懊惱傷心神知命知天且為樂

題南山晚翠圖

姑蘇才子鳳池仙氣吐胸中常浩然能書能詩亦工畫  
妙處徃徃逼輞川不學趙昌畫牡丹金絲粉瓣誇清妍  
不學徐熙畫渚蓮絳綃幄映漪漣酒酣放筆恣揮寫  
崢嶸礫砢天機全墨汁淋漓雲霧濕黛色暝與徂徠連  
生平抱負與衆異勁氣凜凜見毫端初疑晴影落屏障  
六月颯颯秋飈寒又疑潛蛟在素壁帶得寒清洒四筵  
畢宏韋偃稱好手此圖與之孰後先玄都障子不復見  
三絕令人懷鄭虔我昔見松武侯廟龍虎攫擎錦水邊

又嘗見之晉山麓屈鐵交錯森戈鋌歸來對此為動色  
摩挲老眼思昔年固知畫者有深意畫中有意誰能言  
亭亭有若橋與梓並立雲際擎蒼天異材自合棟清廟  
何事老棄荒山巔繁柯亦足備榱桷匠石未遇空連蜷  
吾皇聖德邁姚姒將建明堂招俊賢林間樸櫟尚收拾  
況此異材忍棄捐我家季方愛此畫不啻弘璧出藍田  
寶藏高閣遺孫子肯數米家書畫船臨風更招杜陵老  
和我南山晚翠篇

三臺懷古

長安市中歌布乎關東盟主推本初帝胃岢嶇西入蜀  
孫郎慷慨南吞吳奸閹遺盾最桀黠奮戈頓地地欲裂  
黃雲倏起翳長空黯黯炎精竟淪滅輕車勁卒入鄴宮  
袁家豚犬走遼東燕姬趙女了無失祇留姐已賜周公  
三臺高築漳河曲勢擬未央與天祿璇題翠瓦絢晴霄  
傑閣危闌壓王屋身都冀郡帝許昌時來奉帝歸山陽  
弱寡欺孤似狐媚私心卻欲擬文王成濟抽戈南闕下

崇基旋已歸司馬總惟艷骨已成塵至今惟有當年瓦  
西陵疑冢何累累我來弔古增歎歎欲呼斗酒招文舉  
共論曹瞞弱漢時

壽俞進士母

光風吹綠瀛洲草玉樹瓊芝遶庭好北堂清晝壽筵開  
青鳥雙飛下蓬島座中阿母西池仙霞光滿面霜滿顏  
庭前八子皆秀好就中一子尤稱賢去年對策金鑾殿  
黃封曾醉瓊林宴今年謁告歸故鄉正值高堂氣葱蒨

天香兩袖宮袍碧起舞尊前勸雲液但令阿母一開顏  
不管烏紗漸軟側宜男花暖春正長鳳翎鵲觜含晴光  
願祝慈顏似花好年年此日薦霞觴

題金人出獵圖

陰山寒飈捲晴雪白草蕭蕭凍欲折選徒校獵曉合圍  
萬騎蹴冰如蹴鐵狐裘狐帽紫絨條上凌大磧下深濠  
鐵騎咆哮聲震地毛羣無計可潛逃駕鵝戛戛來何許  
一片晴雲蔽天宇海青直上驚且雄頃刻平蕪洒紅雨

紛飛鶚鶴與鷺鷥  
雨血風毛墮獵場  
車徒獻獲大綏下  
割鮮野食駝蹄香  
金輪半墜西山缺  
饒管嘲轟向區脫  
解鞍繫馬未肯眠  
笑擊黃獐飲其血  
白旂忽動鄂諾河  
猛士更比金源多  
柴潭已涸蔡州破  
狡兔雖肥奈爾何

秋夜搗衣曲

高梧露墮銀牀冷  
宮漏沉沉夜初永  
碧落無雲月正中  
樓臺滉漾玻璃影  
輕移芳屐下空庭  
未拂瑤砧已愴情  
玉腕徐揮搗寒素  
丁東寫出斷腸聲  
非絲非竹亦非木

碎珮繁鈴斷還續壯如巫峽瀉春濤清似寒溪漱鳴玉  
商聲嗚咽徵聲悲散入秋空遠更微公主辭唐嫁回紇  
文姬歸漢別焉支乍沉乍振聲尤苦顧影無言淚如雨  
嚴陵臺上哭孤臣白傅舟中泣商婦砧聲轉急愁轉深  
栖烏驚起啼霜林長風吹入征夫耳應識香閨悵望心  
玉杓斜指天將曙停杵淒然倚庭樹却愛蓮塘水不波  
雙鴛交頸眠香霧

樂樵隱畫虎



山人采樵慣識虎畫虎於今推獨步吮毫濡墨欲畫時  
猛態雄姿宛如覩祇今畫者多擅名往往粉墨肖其形  
孰如此圖造神妙顧盼凜凜寒風生原田每每羣豕暴  
曷不為我盥其腦黍稷與與歲有收田豕從茲迹如掃  
城狐社鼠為民憂為我搏噬無復留村疋稱快共歡笑  
雞鶩成羣散不收嗟哉此圖真可愛魑魅逢之應自敗  
羗兒牧子懾餘威藜藿滿山那敢采

題獅子圖

莎溪之域弱水濱金精下降毓怪珍偉哉狻猊產此地  
雄姿猛態負絕倫雙睛睒睒電流赤勁爪銛牙侔劍戟  
空山怒吼轟春雷百獸聞之皆辟易饑來不食麋鹿羣  
搏犀拉象如孤狔幾迴饑飲龍門涖積石半露餘波渾  
聖皇端拱位皇極月竈冰天皆仰德荒夷得此不敢留  
繫以金繩獻京國脩途萬里經流沙羣動懾竄不敢譁  
尾端尚帶昆侖霧口角仍含葱嶺霞彤軒文陛麗晴旭  
遙望龍顏自馴伏低頭安尾體態閒黃犇蒼髯絢人目

皇威遠被萬國寧長楊靈囿多祥禎  
獅兮獅兮飲鷲猛  
長與騶虞作隊行

題桃源圖

咸陽鹿走羣雄起河北山東多敵壘  
楚鄉耆舊獨知幾  
避地移家阻烟水烟水茫茫別有天  
塵寰疑是地行仙  
誅茅剪棘初為室引水開渠漸種田  
老翁侵晨放鷄鶩  
稚子乘春藝桑竹無刑無賦無追呼  
淳風自是羲皇俗  
兒孫更抱日相親酒食時常會  
里隣桃花隔斷人間路

不識西風有戰塵  
漁郎鼓棹來何許  
競引歸家具雞黍  
當時祇記有秦皇  
此日方知為典午  
水流花謝路榛蕪  
誰把仙源託畫圖  
雲山有路如可訪  
便擬辭家往卜居

十樓懷古

黃樓

在徐州

黃河西來坤軸折  
濁浪排空天欲裂  
彭城老稚哀哀啼  
自分闔門作魚鼈  
仁明太守眉山蘇  
誓以隻手障其衝  
指麾徒旅荷畚耒  
長隄隱起如晴虹  
波恬浪靜民安堵

共喜更生歌且舞九重下詔侈褒嘉拯溺禦災非小補  
飛樓高壓城之東張筵會客何雍容後山作銘頌瀆賦  
筆力直與造化爭瓌雄神遊八表知何處贏得穹碑照  
今古當年舒李今何如羈鬼啾啾泣烟雨

竹樓

在黃州

黃岡使君文中虎勁氣英英隘寰宇西清東觀莫容身  
又擁朱轡守江渚江雲山雨晝冥冥使君對此若為情  
驚濤厭見蛟鼉舞老樹愁聞猿狄鳴平生才名冠當世

每吐忠言裨國是，哆侈竊笑奸諂排。一身南北長如寄，  
使君知命不解愁。竹樓突起江之陬，笑呼斗酒酌前哲。  
風帆沙鳥任沉浮，仙遊今在蓬萊島。陳迹荒涼淒蔓草，  
我來不見樓中人。自酌寒泉薦蘋藻。

燕子樓

在徐州

彭城城下汲水流，弭棹江臯訪燕樓。畫簷綉拱杳何許，  
但見衝烟掠水雙燕愁。憶昔南陽張僕射，文武兼資擅  
聲價。隼旟龍節泣名藩，赫奕威聲震東夏。貞心姱質關

家姬姿容冠世兼能詩明珠買得侍尊俎擊毬張宴常  
相隨曲房邃閣歡未足豈料清歌成慟哭從茲但詠柏  
舟詩不唱秋娘金縷曲十載樓中只獨眠霜晨月夜淚  
涓涓却嗟老大潯陽婦忍抱琵琶過別船

黃鶴樓

在武昌

黃鶴高樓渺煙霧黃鶴飄飄不知處我曾凌風登此樓  
但見蒼茫漢陽樹我聞羽士徐佐卿化為黃鶴朝太清  
雲衢偶爾中金鏃戛然驚飛入杳冥錦袍仙人昔曾到

醉眼摩挲睨晴昊倚闌招鶴鶴不來槌碎瓊樓委荒草  
樓前大別高崔嵬樓下長江滾滾來仲謀孟德今何在  
空遺陳迹後人哀我本芙蓉城裏客謫在塵寰歸未得  
月明黃鶴倘來歸便欲乘之遡空碧

岳陽樓

在岳州

飛樓百尺壓城上坐看長風掀巨浪澄湖周迴八百里  
雨態烟姿千萬狀倚闌一眺心茫然三湘七澤來目前  
欲呼湘女一鼓瑟更起靈均細問天我懷文正高平老



後樂先憂古今少廟堂密勿能幾時遽遣行邊迹如掃  
又懷武穆岳將軍用兵決策如有神樓船剪寇來此地  
功成乃不保其身英雄已矣不可問斗酒那能散孤悶  
欲乘玄鳳上九嶷還就重華訴忠憤

庾公樓

在九江

庾樓昔日瞰江渚高棟危闌撼風雨年深傾圯成荒丘  
月冷蘆汀啼杜宇庾公瀟洒清談人連輝椒掖秉國均  
寡謀輕啟歷陽讐臨難鼠竄私其身冠平尚倖免誅殛

猶東旌旄鎮南國神州未復邊騎驕擁衆何當剪仇敵  
當時叅佐殷謝徒嘯詠風月無遠圖樓中開宴揮玉麈  
志識僅比牧豬奴九原冥冥不可作雲散太虛水歸壑  
廬山飛瀑和雨來似為元規洗餘惡

建國樓

在大梁

銀槍已降鐵槍死建國樓傾土花紫午溝王氣澹秋烟  
始信太原真有子唐家季葉如亂蓬茫碭雲深蛇化龍  
初從劇盜旋納款授節賜名恩寵隆西推強晉東遷洛

雪滿紆干凍死雀窮兇極惡甚阿瞞况復墻茨恣淫樂  
氣盈志足誇成功翬飛傑閣凌蒼穹封丘門外晉王至  
阿兒血濺雕楹紅惜哉未按王敦例剖棺戮尸示當世  
何人獻諂誤莊宗欲偕太阿斬全義

文選樓

在襄陽

漢江綠遶南雍州敗瓦頽垣江上頭羗兒牧豎笑相語  
云是昭明文選樓昭明好學無與比鬪雞肯效諸王戲  
古今作者浩如烟欲選雄渾垂萬世旁搜陶謝曹劉詩

細閱班揚賈馬辭明珠溢目取照乘夷玉在序收懸藜  
江籬沅芷萃靈囿亦有殷彝及周卣誰云小兒強解事  
作者藉之傳不朽江陵典籍亦已多七官文字勤搜羅  
當時不作選萃計化作飛烟奈爾何

柴潭樓

在汝寧

金源立國雄且武蹴宋殲遼跨中土豈知中葉漸陵夷  
虢闕憑陵有蒙古燕京南遷到汴京花帽不守杏花營  
黃河已失哈達死猶欲假息懸瓠城懸瓠額額近荆楚

京湖亦有復仇舉長圍已合效魚麗癡心尚恃柴潭固  
柴潭樓下碧漪漪上有伏弩下潛螭一朝決之入汝水  
螭亡潭固竟奚為幽蘭軒中苦復苦分取遺骸藏宋園  
當年忠烈冠華夷惟有忠臣忽斜虎

按忽斜虎應改呼沙  
呼因韻語故存其舊

籌邊樓

在西川

元和相國有賢子仗鉞擁麾鎮西鄙朱甍翠瓦構危樓  
徼外聞聲盡風靡樓中粉壁圖江山南樓羌僰西吐蕃  
不須聚米著形勢阨塞盡歸指顧間維州向化首來服

凜凜威聲震殊俗可憐相府妬成功  
執送蕃酋逞殘酷誰為此策竒章公  
不恤國是心匪忠馬公反復義利辨  
此論未知吾不從雄姿偉略今安在  
髣髴丹青見風采忠貞世篤能幾人  
獨立風前增感慨

題畫虎圖

長林有獸雄且威非熊非兕非狻猊  
月明一嘯陰風起羣獸膽破爭奔馳  
平臯曠野間縱步愁殺山中狐與兔  
銛牙鈎爪孰敢撓晉國休誇有馮婦  
松坡隱卧攫噬閒

芻牧莫敢窺其間四望凡凡藜藿茂豈知鷙獸在茲山  
雙睛如電良可畏犀象相逢皆喪氣良工畫此向高堂  
雞犬遙瞻俱駭避君不見窮邊仗鉞有虎臣匈奴遠遁  
無烟塵又不見周廬陞戟有虎旅百辟趨朝敢迴顧壯  
哉此獸真軼羣玄章霞彩負奇文莫言鷙猛非所貴蒙  
馬猶能破楚軍

海屋添籌圖壽徐進士父母

華月映綺疏長庚耿銀漢高堂匏竹何煌煌云是佳晨

屆華誕堂中二老仙者流  
碧瞳熒熒明清秋不知甲子  
今幾百但見海屋頻添籌  
鳳為膏兮龍為醢錦帳銀屏  
爛霞彩綠華起舞飛瓊歌  
誰道蓬萊隔瀛海諸郎濟濟  
玉雪姿盡是天上麒麟兒  
就中一子稱白眉春風射策  
登彤墀子兮孝以忠親兮榮  
且壽作傳宜紬石室書盛  
事從來世稀有

過雞冠隘弔曹將軍

將軍諱友聞舉進士調天水  
教授會蒙古攻城糾合



義兵拒之始解圍去制置使製大旗書滿身膽以表之且檄公扼蜀口有功累遷驍衛大將軍已而蒙古合金人吐蕃回紇之兵五十餘萬入寇將軍與弟友萬拒戰於此敵死傷無筭血流二十里救兵不至兄弟俱死於陣全軍盡沒無一降者嗚呼烈哉

曹將軍素虜膽帥閭稱為滿身膽橫戈躍馬馬蹄驕赤霧彌空天氣慘邊塵瀕洞鐵山摧青野原頭萬騎來漢川士女走失魂嬰孺棄擲聲哀哀將軍慷慨髮上指兄弟

同驅誓同死右持龍劍左蛇矛斬刈勁敵如斬豕雞冠  
隘口血成河健馬強兵來益多風淒雨急敵氛惡天不  
祚宋將奈何喧呼動地地欲裂凍鼓無聲寶刀折綿裘  
濕透足難移猶奮空拳誓翦滅虎倒龍顛互啖吞山川  
震眩塵霾昏罵聲愈高頭已斷怒氣勃勃如生存君不  
見呂家兄弟降異土遺具至今誰比數將軍死去三百  
年赫赫英名照今古

題尹內翰家山圖

南山凌蒼冥北山屹絕壁美人愛山住山中恍似當年  
謝安石清溪一帶緣桃花春流滉漾蒸紅霞漁郎到此  
驚且喜祇疑誤入仙人家草堂數間蔭喬木知是美人  
讀書屋晴峰當戶開秋渠飛瀑縈林漱寒玉一從獻策  
來皇都西清東觀恩寵殊長楊不奏子雲賦石室還紬  
太史書閒來却憶釣游處桑梓迢迢隔烟霧舊時猿鶴  
今何如應怨山人不歸去何人寫此家山圖長林遠岫  
春模糊墨雲翻空太陰黑妙筆直與造化俱山腰小徑

僅如髮細看尚恐苔花滑斷崖老樹杳莫窺似聽孤猿啼夜月蹇予舊住金嶂西別來芳草應淒淒對此新圖憶丘壑歸心便逐秋鴻飛人生無如歸去好莫使山中迹如掃何當訪子三顧山共倚長饒拾瑤草

賦得君馬黃贈錢憲使

君馬黃我馬白君馬紫絲韁我馬黃金勒榕城雨霽炎埃清聯鑣共出城南陌城南綠陰涼似洗下馬班荆話疇昔君才卓犖非尋常蚤我金豸承恩光西登岷峨北

太行驚車所歷飛秋霜閨山千里海為疆帝遣侍臣撫  
疲甿青冥空闊孤隼翔當道無復豺與狼往年王節臨  
上杭鼪鼯膽破狡穴荒去年樓船泛東洋支祁帖耳海  
若藏才名籍甚范與張薦剡如雲上廟堂詔遷憲使總  
臺綱驄馬行行過故鄉到家未詫銀黃好且喜堂中親  
未老赤麟為脯玉為漿綠服承歡母草草交游似我情  
最親鶯花同醉曲江春聞君峻擢喜欲舞惜君遠別還  
成嘆兩情繾綣何時已且拚一醉綠陰裏驪駒歌罷玉

餅空笑指三山暮烟紫君馬去我馬歸明朝兩地遙相  
憶滇雲閩樹同依依

見燕憶兒來鳳

去年燕來時吾兒歡笑牽我衣口誦差池頡頏句婆娑  
庭下看雙飛今年燕復至吾兒嗟已逝梁間空聽燕呢  
喃不見兒來堂下戲燕兮秋去春復來吾兒一去再不  
回沉思弱質今何在芳草寒烟翠作堆草色青更青我  
心苦復苦不獨聞猿堪斷腸見燕傷心淚如雨

明妃曲

在項州五陽縣相傳  
即昭君生長之地

寧胡關氏漢宮女為國和親嫁驕虜羶車軋軋向陰山  
回首長安淚如雨黃沙白草路漫漫蕭瑟驚颼徹骨寒  
萬縷幽懷共誰語鵑絃彈罷淚闌干身輕豈不如飛燕  
十年不覩君王面姿態未必慙子夫更夜不得承歡娛  
妾命薄妾自嗟承恩元不在絕色辜負春風滿面花寄  
聲良娣與昭儀莫惜黃金賄畫師昭陽隆寵繫圖繪冠  
世姿容誰得知

題泉州福寧道歲寒三友

淇園此君最瀟洒孤高不是悠悠者同心况有五大夫  
鐵幹銅柯異檉欂羅浮仙子亦清真縞袂珠冠不浣塵  
相逢共結歲寒友肯同羣卉競芳春莫學隋堤柳搖颺  
春風能幾久莫學董澤蒲弱質迎秋半已枯炎風苦雨  
慎相保過眼浮榮奚足道他日棟明堂奏清廟帝鼎和  
羹風味好共持貞潔應時需不負生平冰雪操

讀余玠遺愛碑



蒙古入蜀殺戮幾無噍類余玠以龍圖學士帥蜀據險築城蒐兵養士通商勸農蜀人始有生意時宰信偏裨之譖嗾臺諫論其罪名還竟以憂憤卒其卒也蜀人哀之如悲親戚玠死未幾而蒙古長驅取宋矣眉山黃大有作玠遺愛碑具載蜀受禍之慘與玠再造之功視宋史尤詳予讀而悲之賦短歌以識其事嗟夫士君子懷忠死節而困於讒口者多矣豈獨玠哉

北風蕭蕭戰血腥殺氣晝壓蟻叢城將軍俯首送降表  
況敢仰視櫻其兵龍圖學士奮戈起隻手欲障橫流水  
丹家兄弟亦英雄獻策魚山築高壘連雲戰格控黔中  
鐵馬金戈氣勢雄北兵睥睨不敢近兩川再造伊誰功  
青蠅紛飛點白壁臺諫承風競彈擊指忠為逆逆為忠  
志士含冤氣填臆萬里長城忽自摧蜀中士女空悲哀  
敵騎從此蹂吳甸金闕瓊樓起戰埃招賢亭館今安在  
尚有殘碑紀遺愛欲持杯酒酹忠魂彷彿雲間見麾蓋

君不見馬伏波蠻兵未破謗已多又不見岳武穆中原  
未復家已覆功名自昔保全難烏盡弓藏世共嘆江頭  
廢壘苔花紫千載英雄掩淚看

戲綵圖

雪花繽紛墮雲端銀燭飛光消嫩寒華堂簫鼓慶初度  
仙輶縹緲來青鸞九十慈幃七十子此樂人間能有幾  
子兮有子孫有孫玉樹瓊芝紛旖旎曾孫調錦瑟玄孫  
進瑤觴阿兒種種髮如雪斑衣起舞何踴躍一門慈孝

誰能並况復詩書流澤盛天公剪水作瓊花散作華筵  
表祥慶綵衣舞今日正長龐眉一笑回春陽蟠桃千歲  
正堪摘碧實纍纍清露香綵衣舞今日將暮兒心一喜  
還一懼安得長繩萬丈餘繫彼金烏莫飛去

十禽言

行不得也哥哥山有羆虎水有蛟鼉銛牙利爪競塞路  
仗劍欲往誰敢過勸君歸來且高卧苦竹岡頭安樂多  
不如歸去人生多被功名誤宦成名遂能知足自昔惟

推疏太傅萊公再相老不歸可憐遠謫崖州戶

蘄州鬼譴論從來多逆耳有言逆耳奈若何罷官遠竄  
南荒死當時諛佞非不多端笏朝堂相天子

脫布袴杼軸已空那得布舊袴綻裂願脫之新袴家貧  
誰與做剥膚椎髓何紛然循吏今無廉叔度

婆餅焦不逢樂歲逢玄枵困倉久空兒索餅啼饑滿屋  
聲嗥嗥馬糞火中且煨麵敢望當年煉火燒

提壺蘆相携共向黃公鑪竹葉青兮秋露白問君所嗜

為君沽一杯一曲莫辭醉重來愁聽笛聲孤  
泥滑滑積雨初晴天又雪泥深路滑雪更寒兩足凌兢  
盡流血可憐馬上誰家郎醉擁貂裘却嫌熱

割茆過荒今年饑歉不可當割得茆來何所用賣與巨  
室換餽糧只愁野燒茆又盡兒啼妻泣淚浪浪

得過且過知幾安分終無禍風和莫說文羽鮮雪冷休  
慚毼毛墮故侯還賣青門瓜相君曾向牛衣卧

婆婆繅絲繅得五采光陸離織成山龍與藻火獻諸紫

禁供朝衣祀汾封岱總宜服不須山繭貢萊夷

松坡為奉新胡處士賦

君不見彭澤門前五株柳  
搖曳春光能幾久  
又不見武陵溪邊千樹桃  
落紅凌亂泛寒濤  
君家住在楚江曲  
五畝芳園數椽屋  
園中不種柳與桃  
千箇長松伴幽獨  
大枝夭矯凌蒼冥  
小枝裊娜當簷楹  
月明恍見蛟龍鬬  
風起如聞鸞鳳鳴  
炎埃不到清如洗  
良朋對奕松陰裏  
樵人偶見苦不識  
却疑便是園與綺  
斲苓為餌花為酒  
不

須辟穀求延壽高風瀟灑出塵彭澤武陵曾有否我  
亦生平最愛松夢魂長遶徂徠峰煩君預掃松間石遲  
我來訪彈絲桐

三香圖為白黃門昂賦

藍宮三仙姝貞姿競芳潔何年謫降來塵寰化作三花  
總清絕一在落伽峰珠珮瑤環冰雪容一在羅浮下縞  
袂霓裳光照夜凌波仙子奇更奇水沉為骨冰為肌皦  
然並立風埃表回看紅紫俱堪嗤前身同住仙宮裏故



向人間叙昂季素質元因一氣鍾清芬肯與羣葩比江  
州司馬遺澤長巍然三子如三香娟娟叔季儒林秀長  
公況是黃門郎我願三子宗令德留取芳聲垂簡冊西  
蜀由來重二蘇晉陵行見推三白

金嶂山歌

巍乎金嶂之為山也披霄聳漢吾不知其高但見羣山  
俱在履舄下拱揖拜頌若兒曹或如萬馬競馳驟又若  
長風捲海驅波濤金精峙其南軍山聳其北層崖秀巘

高入雲正與茲山勢相敵銀江滔滔遶其趾深涵清兮  
淺沸白金鱗潏尾日游揚或乘風雷變化生羽翼寒潭  
窅窅深莫測下有虬龍卧澄碧歲旱村翁事禱雨油然  
雲興霈甘澤長松不知幾百年黛色蒼鬱藏雲烟玄猿  
蒼鹿游其下鶚鷺鷺其巔綠陰滿地涼似水我欲  
高卧消煩惱山椒祠宇壯且麗云是炎漢之高帝長陵  
原廟在關中神遊詎肯來茲地琳宮碧殿何渠渠乃是  
釋老之所居相與談空寂講玄虛變幻百出誘羣愚函


香剪紙日奔趨石橋天矯蒼苔滑上有石臺臨木末山  
頭瀑布非練光疑是陰崖未消千古雪東村匝埠多人  
家平原百里皆桑麻民風醇樸無紛華朝耕暮詠為生  
涯蒿邱瀍穀差可擬王官杜曲未足誇紫芝赤箭香綺  
旒雲暖羅生碧巖底采之自足制頽齡何用瓊漿和石  
髓嗟予老病久懸車愛此名山擬卜居何用遂良圖結  
苑三五間種樹千百株看山晨拄笏篝燈夜讀書松風  
瑟瑟似笙竽漱滌塵思半點無雖非午橋莊庶幾南陽

廬惜哉此志未能遂  
悵望雲山增鬱紆

榮壽歌為安陽劉宗濶賦

劉郎卓犖龍頭客  
蚤向彤庭獻三策  
白雲司裏久蜚聲  
寵及雙親何鳥奕  
往年初拜郎官封  
寶敕龍光貫采虹  
今春又錫大夫誥  
玳首金葩絢晴昊  
阿翁烏帽錦為衣  
阿母珠冠光陸離  
顏如渥丹鬢如雪  
榮壽兼全世所稀  
黃花爛熳秋空杳  
繡幙低垂綺窓曉  
雕盤錯落壽筵開  
恍似羣仙宴蓬島  
最憐膝下好兒郎  
瑜珥瑤環雲錦裳

酒酣踰踉紛拜舞左持麟脯右瓊漿賓筵佳客盡珠履  
笑語怡怡歡未已纖歌聲遏鄴臺雲洞簫吹沸漳河水  
漳河水長滔滔願言榮壽亦如此笑摘西池千歲桃



椒邱文集卷二十三

欽定四庫全書

集部

椒邱文集卷二十四  
五

詳校官庶吉士<sub>臣</sub>汪彥博

中書<sub>臣</sub>劉源溥覆勘

總校官進士<sub>臣</sub>朱鈐

校對官編修<sub>臣</sub>許兆椿

謄錄監生<sub>臣</sub>張誠

欽定四庫全書

椒邱文集卷二十四

明 何喬新 撰

詩

七言律詩

附集

賓筵留詠謝內翰楊先生

鑾坡退直共論文  
華館從容日又曛  
碧甕酒分仙掌露  
紫檀香裊博山雲  
黃柑錦荔皆珍味  
玉麈絀編總異聞

鄙劣每慚知遇厚但歌既醉頌夫君

送徐夏官省親畢姻

珊珊清珮出彤墀共羨仙郎荷寵私  
鶴髮想應占遠信雀屏更喜協佳期  
綵衣綯日春光好繡幙凝香曉漏遲  
莫向粉榆久留滯趨朝須及鴈來時

迂齋次夏提學韻

長佩高冠氣浩然從教人笑腹便便  
欲持鑿枘同先哲肯競周容逐少年  
每歎終南多捷徑豈知涑水有名賢



庭前磊砢長松老恥共羣葩較醜妍

無題和李商隱韻

宮怨五首  
仙興五首

唐李商隱賦無題五首蓋託宮怨之情以寓思君之意其引物託興有國風楚騷之旨焉自元以來和者甚衆而憲副郁君又託之以寫其憂深思遠纏綿之情予讀而愛之每韻和二首前五首宮怨子建洛神之意也後五首仙興屈子遠遊之意也第恨詞氣萎弱不足追步昔人耳

風軟耶溪盪綵舟  
蘭橈桂楫漫夷猶  
鵲橋露冷來何暮  
鳳吹雲深逝莫留  
瓊島碧桃偏向暖  
瑤臺琪樹不禁秋  
相如莫奏長門賦  
且聽閨人詠白頭

戶外羊車久絕蹤  
繡衾輾轉聽晨鐘  
心知柳絮飛無定  
愁似香雲淡後濃  
春水洲邊吟杜若  
秋風江上采芙蓉  
夢魂不怕湘江遠  
飛遶巫山紫翠重

綺窓香透桂花風  
夢遶披香別殿東  
仙島不容羸使到  
天河寧許漢槎通  
長蛾鎖恨微顰翠  
嬌靨傷春淺暈紅

怊悵別來憔悴甚鏡中已見鬢如蓬

緩步西廂待月來笑聲何處殷春雷樓中盼盼啼偏苦  
畫裏真真喚不迴鼓罷冰絃添別恨織成錦字惜多才  
妾身渾似庭前草幾度東風幾度灰

薄命情知終愛難更堪弱質易摧殘雲凝楚岫魂應斷  
雨洒湘筠淚未乾午睡最憐鴛鴦被暖夜吟漏覺鮑窓寒  
新愁舊恨憑誰訴自展迴文擁髻看

右宮怨

碧海漉漉樣桂舟瀛洲咫尺且夷猶龍膏每共方平宴  
鶴駕曾為子晉留若木雲消蓬闕曉榆花露冷蕊宮秋  
醯鷄起滅氛埃裏惆悵浮生浪白頭

弭節方壺訪舊蹤雲璈迭奏和華鐘赤城春曉霞光薄  
玄圃秋陰露氣濃剪剪綠衣紉薜荔脩脩清珮製芙蓉  
滄波不阻三山路浪說三山隔萬重

獨跨雲鵬遡曉風扶搖直渡弱流東采鸞去後音容杳  
青鳥來時信息通瑤草葱茸春雨綠丹光隱映曉霞紅

浮沉慾海知多少，頻視真如一斷蓬。

絳節蓉旌縹緲來，靈鼗靈鼓響如雷。  
颺輪低拂扶桑度，羽駕高凌桂樹迴。  
肉食未傳餐玉訣，蓬心豈是馭風才。  
誰能久視層霄上，還向昆明認劫灰。

蓬嶠迢迢去路難，東風又見碧桃殘。  
雲生瑤圃春常潤，露墮金莖晝未乾。  
瓊宇凝神香霧暖，石壇禮斗玉聲寒。  
慇懃寄語求仙侶，河上靈筌仔細看。

右仙興

輓徐編修父

玄洲別却向壺洲祇住人間六十秋  
塵滿小窓飛脉望雲深舊隱噉鉤輈  
墨花零落來禽帖烟樹淒迷放鶴樓  
餘慶綿綿知不已鳳毛今在鳳池頭

元日早朝作

前一日聞  
兩廣捷音

乳鴉啼散夜將闌  
庭燎煌煌啟九關  
劍戟霜明環虎旅  
衣冠雲擁簪鴛班  
彤闈風定聞天樂  
黼座香消識聖顏  
更喜捷書來粵徼  
大廷行見格羣蠻

和高居正秋臺齋宿韻

親承聖語下瑤臺  
齋閣同携襪被來  
茶淪龍團閒嘯詠  
香凝燕寢喜追陪  
起看紫極璿杓轉  
坐待彤庭玉鑰開  
欲寫蕪詞賡絕唱  
愧非汝士軼羣才

陸君孟昭以元宵會客同寅高君居正即席賦  
詩和者相屬予適以事不及往乃用居正韻以  
謝

玄露香浮白玉卮  
共拚一醉對芳時  
銀河夜轉斗橫柄

火樹春回花滿枝  
繡戶月明歌韻杳  
麗譙風細漏聲遲  
慚予未得陪清賞  
吟對寒窓綠幙垂

送憲副王公赴山西

花驄躑躅出神京  
追餞都門酒謾傾  
蘭省當年同戰藝  
栢臺此日獨蜚英  
霜飛絕塞秋橫鶚  
花滿新田曉弄鶯  
明日相思限南北  
暮雲春樹總關情

輓盧都御史睿

玉帳牙旗鎮北陲  
功成歸老穀川湄  
崇勛曾沐當朝眷



清節還令後世思  
綠野堂空雲黯黯  
青門瓜老草離離  
墳前石馬嘶風雨  
猶似榆關破敵時

紫薇精舍為陸孟昭賦其父別號怡晚

四首

丹霞塢裏草堂開  
移得薇花繞舍栽  
紫艷半含春露濕  
清芬輕逐午風來  
百年相業知重振  
二妙文風喜載回  
怪底虹光射牛斗  
五花鸞誥闕泉臺

行春橋畔石湖邊  
精舍陰陰近墓田  
花發紫薇思往事  
氣騰白虎卧新阡  
青楓月冷歸遼鶴  
綠樹烟深怨蜀鵲

怡晚仙人飛珮遠倚闌無語淚潛然

文穆遺墟草樹荒仙郎重此卜玄堂一盂麥飯澆寒食  
幾勺椒漿酌夕陽山勢猶存前古勝薇花還發舊時香  
檀弓讀罷憑軒望宿草芊芊思感傷

吳山深處是先塋更傍先塋構草亭啼月慈烏晨繞樹  
銜花白鹿晝依屏石湖水碧涵窓潤文筆峰高入座青  
相國勛名今不泯薇垣遺種振芳馨

輓太保金公

淮陽人  
二首

台星夜隕哲人萎哀動朝紳淚暗垂補袞每聞禋聖治  
安邈頻見董王師堂堂遺像歸圖畫赫赫元勛照鼎彝  
千載芳名知不朽何須更索說之碑

憶昔先公秉國鈞與公情誼最相親子明舉相惟平仲  
若實論交重景仁遼鶴不歸淮浦月蜀鵲又怨楚山春  
不才為勒碑陰記哀些歌殘淚滿巾

金山曉鐘送陳巨源父南歸

浮玉山前曉駐舟鯨音隱隱吼林丘驚回幽壑潛蛟夢

喚醒孤舟倦客愁遠逐角聲聞鐵甕清蕪漁唱落滄洲  
分明夜半楓橋泊月色江聲滿目秋

虎丘夜泊

千里歸帆下玉京夕陽暫艤闔閭城沉沉梵宇疎鐘吼  
渺渺漁村遠火明芳草空餘藏劍處折楊猶聽踏歌聲  
明朝又鼓吳江棹遥想家山只數程

浙寇敗走詩以識喜

幽壑鼙鼓晝嘯號駢馬四牡敢辭勞霜凝玉斧妖氛豁

雲擁牙旗殺氣高  
荒壘羈魂飛夜燐  
長溪戰血漲春濤  
歸來不用歌饒曲  
皎月當臺詠載橐

廷珍憲副以詩賀予平寇次韻答之

綠林妖祲喜初收  
畫轂歸來得自由  
野戍花深無戰戟  
平田草綠有耕牛  
成功自愧非彬甫  
憂國誰憐似子牟  
多謝故人傳秀句  
瓊瑤乏報祇增羞

將之福清過南臺偶成

宿雨初收絕點埃  
煌煌鳳節出南臺  
長林怪鳥啼猶急

孤嶼妖氛鬱未開，滅竈謾懷虞。詎策運籌誰是子，房才  
薇垣諸老方盤樂。肯念嗷嗷鴻雁來。

擬唐人送宮人入道詩

三首

金屋蹉跎雪滿顛，官家有詔許求仙。夜眠不作湘雲夢，  
曉諷應忘璧月篇。好共采鸞遊潯沆，休教飛鷺妬嬋娟。  
碧桃花底吹笙處，猶似承恩侍御筵。

仙袂飄飄出漢宮，從今罷聽景陽鐘。肯題紅葉傳幽怨，  
祇煉黃芽駐舊容。上苑昔年春鬪草，空壇此際夜依松。

白頭阿監遙相憶知在蓬山第幾重

霞裾廿載侍昭陽喜逐飛瓊事紫皇塵夢已知殊鶴夢  
道粧應覺勝宮粧朝真曉步瑤池月搗藥宵分玉杵霜  
料得未忘恩顧厚丹成還擬獻君王

擬送狀元歸畢姻

恩榮醉罷曲江春又詠桃夭出紫宸  
奠鴈正當鳴雁候乘龍元是化龍人  
金蓮影晃銀屏曉御酒香浮翠杓新  
莫戀洞房鴛夢好早歸鳳閣掌絲綸

元日藩省祝壽謾成口號

銀河星淡漏聲遲  
畫省宵陳祝壽儀  
庭燎春回紅霧合  
爐香風細翠烟垂  
輿圖萬里歸堯統  
歷數千年紀夏時  
最喜太平今有象  
新年民物共熙熙

送韓行人使琉球

星槎五月泛滄溟  
路指扶桑霽景清  
諭粵才華推陸賈  
乘風氣概羨宗生  
彭湖浪靜牙樯穩  
高嶼烟消畫鷁明  
遙想番王承寵命  
幾回膜拜望神京



小軒夕坐歸思浩然

閱盡人間是與非  
鄉心戀戀北山薇  
坐憐黃菊霜前老  
笑指閒雲雨後歸  
已學莊生齊得喪  
懶從詹尹卜從違  
歸歟袖却屠龍手  
重向江頭訪釣磯

題黃君愈宣江山一覽亭

危亭翼翼倚晴空  
百里江山入望中  
俯檻銀溪紆素練  
開軒金嶂聳屏風  
波光瀟瀟搖文几  
嵐靄霏霏撲綺櫳  
我欲携琴亭上醉  
夕陽影裏數歸鴻

酬羅內翰贈別用原韻

滿蓬烟月發盱源又共先生醉別罇  
百歲可憐猶旦暮  
一腔元自有乾坤文如班馬身何益  
學到關雎道乃尊  
此夜且論千古事不須切切問寒溫

分題得玄鶴壽程郎中父母

緱嶺歸來骨已仙  
雪衣蛻盡漸成玄  
舞隨蒼鹿應難辨  
色比青鳥似更妍  
高頂蒙茸含墨暈  
踈翎黯黯帶茶烟  
華堂此日稱觴處  
好奏南飛薦壽筵

輓李諫議柰詞

以家宰王公爲入官其致仕也貧無以歸秦府特賜歸喪

贊政薇垣際盛時  
蕭蕭短髮欲成絲  
歸袞偏沐賢藩寵  
薦剡曾蒙太宰知  
夜月槐柯俄入夢  
秋風薤露忽興悲  
翠珉誰與銘遺德  
千古無慚有道碑

壽楊內翰母作

以初度之日受封

華屋笙歌曉漏遲  
露香庭戶爛金芝  
正當北闕推恩日  
又是南山祝壽時  
慈竹影涵瑤席潤  
靈萱花映翠冠垂  
陽岡采鳳方高翥  
分得黃封薦玉卮

送余僉憲致仕歸南城

桂嶺驅馳雪滿顛，乞身深荷聖情憐。  
晚香采采籬邊菊，歸思飄飄江上船。  
醉裏呼童歌白紵，閒來振策濯紅泉。  
不須更覓瀛洲路，老得閒居即是仙。

送羅應奎左遷提舉

三首

內翰羅先生以進士大魁擢居侍從，抗疏陳國家大計，坐是出提舉福建市舶。先生起自疎遠，立朝未百日，乃能言人所不敢言。吾曹終歲默默，不能有所建。

白聞先生之風愧死矣故於先生之行也賦詩三章  
以贈之

龍飛二載狀元郎三策纔陳又抗章忠孝不孤明主望  
迂疎任笑老生狂同遊愧我非田晝當道知誰惜予方  
千古高名何所擬七閩山色鬱蒼蒼

曉捧函書叩帝廷宸旒垂聽具臣驚丹心耿耿明秋日  
勁氣稜稜薄太清鄒浩犯顏非賣直陽城伏閣豈要名  
此行不比湘潭謫莫賦騷辭弔屈平

閩山迢遞是天涯去路荒涼倍可嗟  
林晚饑鳥啼刷羽潭春妖鱷怒磨牙  
冰銜敢愛當時寵鐵漢從交後世誇  
畢竟皇恩深似海肯令賈傅老長沙

張先生升謫後復職

垂老窮邊衆所悲賜環何幸沐恩私  
受廬已脫新編籍振鐸還為後學師  
座隱青氈朝結課香凝絳帳晝哦詩  
不須更續投湘賦好詠菁莪樂盛時

輓鮑黃門輝詞二首

萬里從龍狩北荒  
塵沙獵獵塞雲黃  
自揮寶劍長驅虎  
恐向穹廬學射麋  
清血淒淒成碧草  
精忠耿耿凜秋霜  
九原若遇馮長樂  
應愧當年拜德光

落日風吹戰血腥  
黑雲慘澹壓邊城  
祇知大義千鈞重  
直視微軀一羽輕  
死去無慚周富子  
生還不似漢蘇卿  
英魂不共陰飈散  
願化欃槍墮敵營

送任丘胡教諭

寒雲釀雪正沉沉  
尊酒離亭思不禁  
西蜀久鳴芹泮鐸

壯河又鼓杏壇琴家聲好聞蘇湖教道學須探瀛洛心  
去去莫嗟官况冷三鱸會見集堂陰

謁岳武穆王廟用趙子昂韻

兩都兵後黍離離誰念天潢國勢危鐵騎正謀探虎穴  
金牌連召仆牙旗黃龍痛飲空遺恨赤縣分崩竟莫支  
欲弔忠魂何處是淡烟衰草總含悲

秋日行臺書懷

涼透疎櫺暑氣微倚闌無語對斜暉歲華冉冉嗟將老



心事悠悠悵屢違自道退之偏致謗誰憐伯玉漸知非  
行臺袖却屠龍手坐看羣鳶競鼠飛

紀夢

成化十二年冬十月朔予奉臺檄招撫流民於汝川  
是夜夢遊一洞洞左右石壁黝然榜曰紫雲洞府中  
有殿宇如道家所謂三清殿者侍衛頗嚴中左設虛  
座其右有一塑像幙頭白衣金帶白衣之下有一人  
紗帽青衣金帶端坐若假寐者諦視之則予亡友福

建憲副游公大昇也。予歷階而上，徑至後殿，見其燕  
穢不治，遽出至前殿，連呼曰：「大昇在此乎？」大昇在此  
乎？大昇趨而就予，予憶其已死，勞其良苦，大昇無言  
微笑拱手而已。予詢以前程事，大昇答云：「予又問  
此是何處？予今為何職？」大昇欲言，傍有一老翁目之  
而止。予遂出大昇，送至洞門而別。俄而覺，則麗譙已  
三鼓矣。念大昇儀容宛然在目，揮淚久之。大昇清慎  
有學，其官於閩十餘年，閩之士子愛之如父母。其歿

也諸生肖其像以配常衮今予所夢若此豈其死而  
為仙耶賦一律以紀之云

故人化去幾經年宵寐相逢倍愴然翠栢臺中曾作使  
紫雲洞裏又為仙生前每感交情厚身後還將吉語傳  
惆悵冥交那再得潛潛清淚滴重泉

淮瀆祠詩

祠有漢碑及御香亭二首

桐栢靈源何處尋涓涓一脈發胎簪東歸大海奔流壯  
南匯山陽借潤深金薤晶熒遺刻在寶沉馥郁御香臨

年年禳禱陳牲璧願祝繁釐答聖心

碧殿玲瓏切絳霄飛甍時見瑞烟飄  
疏封舊沐長源寵濟旱今看霈澤饒  
奠璧靈官宵秉簡函香天使曉乘輶  
時豐民樂邊無警好展神功翊聖朝

憲副郁公回速追餞不及詩以寄之

故人應怕醉離亭五鼓驅車出鄧城  
茅店雞聲霜氣重荒途馬色月華明  
開尊寂寞孤吟倦隱几蕭條百感生  
遙想行臺宵弭節嶺雲江樹不勝情

襄陽懷古

旬宣南駐楚江湄，登眺悽然淚欲垂。  
秋雨薰葭文煥壘，春風蘋藻壽亭祠。  
岷山不改當年色，漢水應無舊勒碑。  
日暮平原春燒起，恍疑吳晉合兵時。

謁李潭州祠作二首

玄雲慘澹壓孤城，城外蕭蕭鐵馬鳴。  
一室甘心俱就死，三軍效節忍偷生。  
英魂不共寒蕪沒，精爽猶隨夜燐明。  
采采溪毛酌清泚，臨風三酹不勝情。

賈相當年秉國鈞賢臣遠斥任諛臣豈知末路攄忠士  
不是平原獻諂人呂氏諸郎甘納土李公一族競捐身  
新祠翼翼湘江上一讀穹碑一愴神

登岳陽樓作

四首

城上翬飛百尺樓憑高一眺散離憂九江淼淼天邊逝  
萬象森森鏡裏浮晴靄曉迷蛟女室涼颺晝送估人舟  
文章誰似高平老熒熒虹光映斗牛

闌干十二碧玲瓏千里湖山入望中雲影淒迷涵遠岫

波光滉漾浴晴空登臨誰識希文意俯仰深懷大禹功  
江草江花紛在目凭軒脈脈看冥鴻

雲窻月牖俯清流滿目山川快壯遊誰在江湖懷北闕  
謾誇樓閣冠南州朱絃夜鼓湘靈瑟錦纜春回楚客舟  
欲起靈均歌九辨澧蘭阮芷正颼颼

危樓高與白雲連吟倚朱闌思浩然七澤搖光浮几上  
三山飛翠墮罇前老龍應識懷襄日遺刻猶題慶曆年  
欲駕蒼虬朝帝闕長安祇在夕陽邊

沅州

潭陽遠在夜郎西石徑縈紆路轉迷俗獷猶存盤瓠舊  
樹深惟聽鷓鴣啼茅簷彫弊哀三戶嵐靄氤氲接五谿  
欲弔靈均何處是江頭蘭芷正淒淒

過劉大有先生故居

大有諱有年其先本廬陵人元季徙家沅州洪武中  
以明經起家擢監察御史學行焯焯有稱尋以辭官  
養母忤旨謫通州擺站間於州故家得儀禮逸經十



八篇上之詔藏秘閣復起太平知府文廟入正大統  
以不肯迎駕謫雲南黔寧昭靖王知其賢遣諸子從  
學且薦於朝及交趾平起為交趾按察司僉事其卒  
也黃忠宣公誅之曰江湖習次洙泗規模文宗韓柳  
學本程朱其為名流所推如此予過沅州訪其後有  
二孫一為別駕一為縣尹皆致仕家居而二曾孫為  
州庠生庶幾不墜其家聲問其儀禮逸經已亡矣出  
其遺像遺稿并學士斛公所作環壁軒銘覽之益興

高山景行之歎因賦詩以致子意馬

五畝荒涼古道邊追思風範重凄然雄詞直躡元和後  
妙道還探太極先環壁遺堂猶有託曲臺逸禮已無傳  
諸孫濟濟承家學却喜名家不乏賢

題徐氏貞節卷次羅應魁韻

梧桐秋老負心期况復霜摧碧玉枝弱草棲塵空自悼  
狂瀾倒海詎能移高風不愧曹家婦浮藻堪羞蔡氏兒  
繾綣淒淒寒漏永挑燈朗詠栢舟詩

過嘉禾懷南豐先生

嘉禾驛下暫維舟，追感先賢淚欲流。  
學術自應超董賈，文章元不讓韓歐。  
讀書岩圯蒼苔滿，洗硯池荒暮雨愁。  
故里只今多俊彥，不知誰解繼前修。

發建昌別會同智同二猶子

汝輩應憐濟叔癡，相携追送楚江湄。  
離歌莫慰離愁惡，別酒那禁別淚垂。  
疲馬欲歸還戀戀，孤舟將發更遲遲。  
臨歧不盡丁寧囑，好讀斯干棣萼詩。

病中述懷

兩鬢飄蕭覺始衰，疎狂猶似壯年時。  
冰山不願依楊相，鐵漢從來慕器之。  
肯棄膏粱羞董喙，忍携琬琰易羊皮。  
試看衛霍燕然勒，得似當年有道碑。

過鴈門關作二首

征騎蕭蕭度鴈關，危巒絕巘力躋攀。  
東瞻帝闕祥雲裏，北望戎庭落照間。  
李牧壘荒烟樹老，晉王碑在雨苔斑。  
臨風慷慨懷前烈，撫劍長歌一愴顏。

雄關樓閣勢輦飛獨倚危闌送夕暉萬里山河歸管鑰  
三邊將校屬旌麾鷓鴣泉竭邊兵困首指烟消塞馬肥  
薄暮轅門笳鼓競前驅擒得真韃歸

甘肅元旦次朱都憲韻

玉關雪霽絕狼烟殊勝呼韓款塞年萬竈貔貅森列衛  
兩班冠劍儼羣仙明珠翡翠來重譯卉服氍毹表一天  
羽檄不飛刁斗靜蚤看嘉績勒燕然

過長城作

在武寧關北其東九十里  
為狼牙村宋楊業戰死處

斷垣迤邐亘縻坪云是秦人舊築城折戟每因耕後出  
斜蒿時向雨餘生甕門草滿鼃鼃嘯雉堞雲消鶴鶴鳴  
東望狼村三舍近淒淒烟樹倍傷情

輓王都憲

漢口當年醉別卮豈知嘉會更無期玉關已喜生前入  
汗簡空垂沒後思夜月柳營笳吹斷秋風萬里鐸聲悲  
白茅藉飯無由致南望章江淚滿頤

送朱都憲巡撫兩廣兼總督軍務

紫袍香拂御爐烟，出鎮仍兼將相權。  
鐵騎千羣嘶去路，繡旂五色照離筵。  
榕城霜重炎氛淨，桂嶺雲消黛色鮮。  
文武兼資能有幾，蚤看勛業繼名賢。

輓德安張都憲瓚

黃鶴磯頭醉別筵，別來雲樹兩茫然。  
纔聞奏對趨三殿，忽訝音容隔九泉。  
衰草晚烟平寇壘，長隄春水餉兵船。  
欲尋斧屋湏川曲，鼓子花殘落照邊。

送李黃門孟暘使占城

金函頒詔出彤墀特命儒臣撫島夷龍節遠稽周典禮  
鷄林重覩漢官儀海雲欽色迎丹仗水怪潛形避絳旗  
路過越裳煩告諭皇家威德邁周時

過暢村作

在河津縣

行行足馬過孤村土屋荒涼晝掩門豪客用人如楚子

羣盜殺人祭旗而食之

名家羸莖似王孫

巨室厚葬者盜剖棺羸其屍

怪鴉磔

磔烟光暮冤鬼啾啾月色昏太息生靈餘幾許空原一

眺黯消魂



絳陽道中謾成

城郭蕭條村落空，潛然清淚墮西風。  
萑蒲有盜如朱粲，

朱粲好食人肉

郡邑何人似鄭公？

富鄭公知青州活流民五十萬

雲暗荒郊啼

餒鬼，日斜古道泣衰翁。獨慚未有匡時策，翹首蒼冥祝

歲豐。

山西大饑人相食哀歎之餘謾成一律

春風不入野人家，白骨如丘事可嗟。  
小甕滿儲彭越醢，輕車穩載德光羝。  
頭顱無復歸黃壤，腥腐猶能飽暮鴉。

立馬郵亭倍惆悵幾行老淚洒煙霞

喜雨詩

三首

翩翩鴻鴈正哀鳴誰把天瓢此夕傾  
稻畝青回春意足  
蘋池水長曉波清殘民已有生成望  
委巷初聞笑語聲  
愧我西來無寸補載歌周雅頌皇明

屏翳驅雲晝不開龍瓢滴滴自天來  
纔看白練垂簷隙  
忽報銀河落澗隈  
嫠婦從今收滯穗  
田家無復嘆汙萊  
朝來默聽民歌頌  
盡道皇仁被九垓

天心允協帝心仁一雨祁祁慰我民潤洽枯荻含秀色  
涼生遠樹絕煇塵汙池喜聽蛙聲鬧荒圃驚看菜甲新  
只恐戶曹徵稅急遺黎依舊走逡逡

和安道憲副潁陽元日述懷

是日雨雪二首

行臺吏散晝無譁此處停驂即是家古栢每憐含晚翠  
枯荻漸覺換春華壽觴香泛金莖露瑞雪寒凝玉樹花  
却笑病軀偏冗迫晨興不待玉衡斜

病起那堪燕雀譁式微歌罷苦思家梁公尚不知師德

介甫惟聞薦子華世事悠悠蕉下鹿人情淡漠霧中花  
鄱湖西去先廬在歸夢時穿竹徑斜

弘治三年春三月望上御奉天殿親策天下貢  
士命公卿及文學之臣赴東閣讀卷都憲屠公  
賦詩以紀盛事諸公相屬和之僕忝同事謹步  
嚴韻不自知狗尾續貂之不可也

御柳低垂禁苑春臨軒又覩縉儀新羣英獻策陳王道  
諸老賡歌頌帝仁待漏金門晨整珮論文玉署晝垂紳

連宵襪被容臺宿遙望奎光映紫宸

天子龍飛海宇春盛時典禮喜重新  
文華讀卷瞻天表楮幣頒恩荷聖仁  
光溢金卮分御醴香浮寶鼎散朝紳  
得賢深為皇家喜曳履從容出禁宸

傳臚之明日賜宴禮部凡供事者皆與焉都憲  
屠公又賦一律僕再和之

恩榮曾醉杏園春垂老重霑寵命新  
餅剪紅綾思舊製酒分黃縹倚深仁  
雲隨舞羽來庭祀風送天香到珮紳

聖德如天慚未報載歌魚藻拜楓宸

文華殿讀卷次司馬馬公韻

彤樓日轉漏頻催獻策咸推賈董才  
吾道喜同文運泰聖顏還為直言開  
儒臣捧卷來深殿常侍濡毫近上台  
日晏傳宣催賜宴五雲高處醉金杯

謹身殿開卷出聽傳臚次學士李公韻

霽月當空八牖明履聲晨竝殿廊行  
上卿開卷初題榜宣贊當階迭唱名  
天際慶雲昭瑞應御前大樂奏和聲

金明路上人相語天與吾皇產俊英

恩榮宴又次學士李公韻

簫韶當庭奏樂頻瓊林錫宴際芳辰槐陰綠映伶官服  
花氣香飄舞佾中淳酎潤含仙掌露歡聲散作帝臺春  
英聲感激爭相勉誓秉忠貞敢愛身

東閣讀卷次少司空謝公韻

金鑒策士詔羣卿禮樂縱橫細與評黼黻舜衣期補袞  
鹽梅商鼎用和羹喜聞瑞靄空中見肯羨青雲足下生

記得蚤年登第日藍袍濟濟看題名

譚都督祠

鐵騎憑陵壓北門將軍擁卒戰平原  
秋風孤戍邊聲急落日重圍殺氣昏  
帳下健兒爭效死陣前強敵暗消魂  
至今溪水含餘怒夜半填然萬鼓喧

九日登鷓子崖

秋風吹我上層崖周覽茫茫亦快哉  
對菊始知佳節到看山却喜壯懷開  
浮雲變態元無定逝水奔流不復回



北望帝城纔咫尺金觚玉闕是蓬萊

送張啟昭

勸講文華沐寵優欲將直道贊皇猷金人何用三緘口  
鐵漢從教一斫頭臺諫文章良可笑儒紳咋舌亦堪羞  
聖恩眷注元無替肯使南都久滯留

鄉邦交誼最相親恐向離筵勸酒頻抗疏但求禪聖治  
論思端不忝詞臣自憐石介非狂士任詆西山是小人  
暫別鑾坡非遠謫莫將辭賦吊靈均

東河驛寄京師諸友

北山歌罷淚浪浪承命西來鳥道長使節晝衝秦嶺雪  
征驂曉踏渭橋霜愁腸暗逐鵲聲斷歸夢常隨鴈影翔  
京國同袍應笑我馬蹄連歲為誰忙

白瀑寺用壁間韻書懷

宦轍馳驅志已慵無心更覓徹侯封但令氣節垂青簡  
不羨勛名勒景鐘官况天邊雲澹澹客愁雨後葉重重  
呼童汲取山頭瀑一洗秋來憔悴容

播州行臺偶書

萬里馳驅到夜郎親承紫詔諭殊方  
欲持清白光先訓敢毀廉隅負聖皇  
琴鶴不教隨使騎金珠况肯入行囊  
賓朋試解慳囊看祇有新詩十數章

早朝聽誓戒

彤樓鐘動萬鴉飛玉珮珊珊向禁闈  
銀燭影搖溫室樹寶爐香拂侍臣衣  
鴻臚傳制依黃道禁旅鳴鞘拱紫微  
朝罷從容歸陋院喜看旭日散晴輝

駕出南郊

羽林清蹕出都城聖主南郊展敬誠  
紫極氛消春日麗黃壇塵靜曉風輕  
雞翹影逐龍輿動鼙鼓聲隨象輦鳴  
歡溢臣民咸抃舞此生何幸覩昇平

齋居賜蜜餌

金盤蜜餌出彤庭天語丁寧賜列卿  
宋室鳳團寧擅美楚宮椒糈浪馳名  
香甘方士青精飯潤滑仙家紫石英  
衰朽自慚無補報載歌天保祝皇明

南郊陪祭

聖朝奠璧禮園丘萬炬飛光映冕旒齋殿雲深清漏迥  
燎壇風暖瑞烟浮靈祗分獻多儒碩輦路羣趨盡徹侯  
湖海愚臣忝陪祀愧無詞賦頌鴻休

憲副郁公惠青布及詩酬以白紵并賦詩答之  
湘川別後幾星霜青布慙慙遠寄將展玩尚涵江氣潤  
裁成長帶澣花香詩人莫刺蜉蝣羽騷客空誇薜荔裳  
白紵愧非瓊玖報池亭聊用納新涼

秋夜齋宿懷仲深宗伯

耿耿星河映戶明，齋居徙倚不勝情。  
啼蛩石砌秋聲早，落葉銀牀夜景清。  
歸計未成心轉急，炎威漸退氣初平。  
知公亦有幽栖志，何日聯鑣出鳳城。

出京偶成

九重命下許歸休，便向江頭買去舟。  
客夢未離金闕樹，鄉心已逐楚江鷗。  
身同裴相投閒樂，事異靈均去郢憂。  
聖德如天慚未報，回瞻紫禁思悠悠。

太宰介庵先生以詩餞別用原韻奉答

四首

曉拜彤墀出帝城  
寒江歸去結鷗盟  
秋蘭蕭艾何香臭  
蟬翼黃鐘孰重輕  
滕甫未應為惡黨  
休文非必是狂生  
於今誰秉春秋筆  
忠佞廉貪好細評

謝病連年叩紫宸  
掛冠今喜作閒人  
思尊正值新秋候  
種豆還期故里春  
憂國獨憐君實切  
論交誰似景仁真  
炎風朔雪煩調燮  
珍重當朝社稷臣

曉納牙牌別禁城  
竹梅擬結歲寒盟  
君恩何啻萬鈞重

行旅從來一葉輕誓保忠貞全晚節肯求溫飽負平生  
鶴山未必非君子成大如何敢妄評

冠蓋追隨出拱宸知幾已後繪鱸人黃花爛熳東籬晚  
紫葢離披別墅春誰識張湯多變詐自憐汲黯任天真  
歸與且飽魚羹飯休論忠臣與佞臣

歸田後連得二子秋官郁君以詩相賀次韻答  
之

垂老乳乳每自憐雙雛初乳却歡然竇家驥鳳雖難比



白傳文章蚤有傳，稍喜階前瑤草秀。  
敢誇掌上寶珠圓，山間湯餅無煎味。  
聊和新詩侑慶筵。

靜倚松窓感物華，平生蹤跡半天涯。  
蜀秦鳥道頻馳傳，楚粵鯨波幾泛槎。  
有口耻嘗樓護膳，無廬肯主瘠環家。  
悠悠往事休重道，且向青門學種瓜。

秋夜不寐卧誦郁秋官詩用韻述懷

南北驅馳嘆獨賢，歸來林下喜陶然。  
幸多圖史留兒讀，詎有勲名與世傳。  
抱甕雖勞甘守拙，方知欲鑿耻為圓。

茆簷飽喫魚羹飯似勝侯家玳瑁筵

宦游幾載厭紛華乞得閒身釣水涯  
騎馬懶從聽禁漏問津直欲泛仙槎  
雖無食客堪延譽幸有癡兒可保家  
負郭何須田二頃數畦祇種邵平瓜

子弟廷祺園中紫牡丹盛開邀予賞之醉後賦  
二律以識其事時弘治八年二月廿二日也

看花幾見洛陽春魏紫嫣然迥絕倫  
玉板每慚攀逸駕鶴翎無計避芳塵  
香同荀令攜來好色似韓湘染未勻

今日對花須盡醉黃筌畫裏本非真

前身應是紫薇郎化作名花擅國香  
初訝曉烟籠翠幄忽疑甘露沁霞觴  
靈根淺映蘭芽嫩穠艷微涵歛硯光  
世代祇今憐間色誰脩花譜續歐陽

讀康齋集作

吳徵士與  
弼所著

瀟洛關閨迹久湮斯文何幸得斯人  
朱絃一曲聲偏澹玄酒千觚味獨醇  
竹色花香元自樂芸編綃帙不為貧  
紛紛黃小休輕訕見道誰如此老真

閒居述懷

萬里歸來已白頭  
溪風山月思悠悠  
黃河鐵騎成春夢  
錦水牙檣憶舊遊  
病後更添元凱癖  
閒中還抱杞人憂  
桃花流水知何處  
願與漁郎共放舟

都憲韓公貫道惠詩次韻答之

二首

疎庸久荷聖明知  
却恨非才負盛時  
三晉雲山應識我  
兩京議論竟歸誰  
閒尋平子歸田賦  
懶誦靈均問卜辭  
渭樹江雲嗟契闊  
何當一醉習家池

老得懸車古亦難  
桔槔春雨靜中看  
昔年曾叱王尊馭  
此日休彈貢禹冠  
春草池塘詩思逸  
午橋罇俎酒腸寬  
蕭蕭風雨鷄鳴夜  
菊枕蘆衾睡正安

癸巳歲藩省祝壽和自立韻

文武班聯玉笋行  
紫袍赤舄爛成章  
共推寶歷承三統  
更喜皇風被八方  
香影暗隨雲影動  
恩波元共海波長  
炎荒未許淹弘識  
佇見鳴璫侍聖王

兩階劍珮儼成行  
縹緲登歌奏大章  
萬國衣冠環北極

九天雨露洽南方香飄仙仗微風度星轉銀河曉漏長  
最喜三邊氛祲息征西諸將縛戎王

宋玉宅

即安陸州學

舊宅蕭條泮水隅騷人曾此托幽居荒臺日暮無行雨  
廢圃春深有揭車茂樹欂櫨搖落後誇辭曠朗變風餘  
巫陽歌罷秋天迥應有遺魂返故墟

樊城懷古

仲山甫所封之地

斷垣衰草古樊城勝國當年此戰爭往事已隨流水逝

空山猶倚暮雲平  
幡幢隱隱仁王寺  
葭蕭蕭虜將營  
登覽悵然懷往昔  
烝民歌罷不勝情

謁賈太傅祠作

二首

漢殿從容席屢前  
得君何事遽南遷  
孝文猶自疎賢佐  
絳灌能無妬少年  
寂寂荒祠啼鶚鳥  
沉沉遺甃冽寒泉  
從來材大難為用  
惜誓歌殘一泫然

經國材猷迫絕倫  
春秋以後見斯人  
誰知一代興王佐  
遽作三湘放逐臣  
斜日坐隅來怪鳥  
寒烟江上弔靈均

須知窮達皆由命何用悲傷自殞身

題徐氏貞節卷

孤篁勁栢翠交加靜處幽閑閱歲華  
誓保貞骸歸北壟恐移芳屐到東家  
梁間愁見春巢燕庭際羞栽夜合花  
青簡已書中壘傳昭昭姱節世爭誇

舟中感懷集句

短棹吳歌花滿川

鄧文原

客心何事轉悵然

高適

平生自笑

王夷甫

子昂

少日真期魯仲連

杜本

獨對青燈思往事

張耒

恐



將離恨托哀絃

龍仁夫

故園尚有平生約

鄧文原

落日孤雲

望眼穿

元好問

題桃源小隱集句

桃源面面少風塵

王維

獨構茅堂養道真

薛玄義

萬葉秋聲

孤館夢

汪水雲

一庭草色自家春

復見心

祇從暮醉兼朝醉

却恐閒人是貴人

李羣玉

借問路傍名利客

崔顯

朱門雖

富不如貧

陳希夷

椒邱文集卷二十四